

Ensin matices nin retrasos: **¡OFICIALIDA YA!**



Izquierda Asturiana (IAS) participa dende la so fundación nel **Conceyu Abiertu pola Oficialidá (CAO)**. Entendemos qu'ello ye un exerciciu de responsabilidá na xera común de sumar voluntades na defensa de la oficialidá de la llingua asturiana. N'IAS préstanos tamién constatar el puxu que vuelve garrar el movimientu de vindicación llingüística que ta demostrando una **fortaleza, influencia ya independencia de criteriu inéditu na historia de los últimos años**. Nel CAO ya somos más de 100 organizaciones y colectivos y ye mester dir enanchando la estaya y axuntando con nós de forma activa al conxuntu de la sociedá que ya comparte, según amuesen toles encuestes, les nueses xustes reivindicaciones. Pa que la vozona que seyamos a xuntar entre nel parlamentu asturianu y les fuerces polítiques que van votar l'estatutu d'autonomía tean obligaes a reconocer el **derechu llingüísticu** en forma d'oficialidá nel próximu estatutu.

Nun podemos escaecer güei la responsabilidá de los que nos gobiernen, un gobiernu de coalición que nun ta respondiendo nin a les expectatives más mínimes pa cola llingua asturiana y que, perfeccionando les vieyes técniques del PSOE, **amazcara la realidá y tapez una verdá evidente: la muerte de la llingua asturiana**, de la que toos, **PSOE y IU-BA son cómplices y colaboradores necesarios**. Especial responsabilidá tien una fuerca como IU, qu'utilizó y utiliza siempre que ye quién, el movimientu ciudadanu pola defensa de la llingua pa lo propiu interés y que, si esti nun concuaya colos sos intereses políticos coyunturales, desdexa l'enfotu de los que vieron nesta formación una alternativa pa defender los intereses d'Asturies. Nun somos a escaecer como IU acusaba de **traidores na reforma del estatutu anterior** a los que defendíen esi adefexu de la "oficialidá diferida" (que ye una "oficialidá-trampa") como un mínimu y agora, que ya nun tienen rivales políticos nel Parlamentu asturianu que xueguen nesi campu, usen esa oficialidá diferida como puntu de partida pa la **negociación estatutaria**. **Si esi ye'l puntu de partida ¿Cuál será'l de llegada?**. Dende IAS vamos recorda-yos que si IU almite un estatutu ensin oficialidá, -la oficialidá de verdá, con toles consecuencies-, amosará la so verdadera cara y dará una preba más, y ya son munches, de la so hipocresía política, baxeza moral y la so **percepción utilitarista de les ideas**.

Nesti momentu **Asturies nun tien ferramientes polítiques** que, dende les instituciones defendan de forma afayadiza la nuesa cultura y la nuesa llingua y ye responsabilidá de toos y toes **llevar una respuesta a la situación d'anguaño que seya a influir na política asturiana y ser a poner la cuestión identitaria, la defensa de la cultura y la llingua, nel centru de l'axenda política del país**. Nun momentu como esti, de **redefinición del modelu d'estáu**, nel que'l restu de países con llingua propia tán algamando avances y faciendo sentir la so voz, **Asturies vuelve quedar arrexada** y ensin voz propia. N'IAS tamos convencios de que ye posible y ye necesario **llevar esa alternativa política que ya vaga pero qu'una parte importante de la sociedá asturiana ta demandando énte l'esbarrumbe que ta sufriendo la nuesa nación** non sólo nel campu cultural, tamién nel económicu, social, éticu y ecolóxicu.

Mentanto dende IAS vamos seguir **xuntando fuerces** colos y les que na cai, tolos díes, ensin descansu, col rixu del que sabe que tien la razón del so llau, glayen una vuelta más, como güei n'Uviéu esti 5 de payares:

¡¡L'ASTURIANU LLINGUA OFICIAL!!



www.ias.as

contacta@ias.as

Plaza Primo de Rivera, 5

entesuelu, oficina 9

33111 Uviéu - Tl/Fax: 985.11.20.97

www.ias.as/mias

mias@ias.as